

文廟祀典攷



文廟祀典考 全十冊

清·龐鍾璐編

江蘇廣陵古籍刻印社出版
揚州古籍書店發行

一九八二年二季度出版 定價一百零六元

文廟祀典考卷四十九

賜進士及第 誥授光祿大夫 經筵講官刑部尙書常熟龐鍾璐編輯

奏議彙鈔一

太學之立議自董仲舒而推尊孔子之素功梅福實發之
自唐開元以後議禮者代不乏人或當或否略見於祀典
溯原矣維我

列聖右文稽古尊崇之典一稟

睿裁而臣工論列苟有當者無不

採納以示萬世之至公謹錄奏進之文見於志籍及部議章疏頒
行直省者彙爲一集私家論述則無取焉

條陳崇聖學疏

順治元年山東巡撫方大猷上

先聖孔子爲萬世道統之宗

本朝開國之初一代綱常培植於此禮應

敕官崇祀復衍聖公并四氏學博等之封可十國脈靈長人文
蔚起古來啟運之主盡有崇祀之文禮宜先施碑誌可考謹詳
列歷朝恩例以備採倣而行一公爵孔子嫡孫則承大爵自秦
始皇始封孔鮒爲文通君歷代封爵不一有加無已悉載史冊
可考至宋仁宗始封爲衍聖公至明賜正一品服色麟袍玉帶
三臺銀印一顆列文臣班首歷傳至今自天啟二年又晉階太
子太傅襲封衍聖公一衍聖公長子至十五歲襲授二品服色
至崇禎年間各公侯伯長子俱加玉帶事例相同一博士衍聖
公長子則承大爵次子至十五歲則授以世襲翰林院五經博
士以主子思子祀事三子則襲太常寺博士主汶上縣聖澤書
院祀事每隨一代公爵遞爲更授一知縣天下州縣皆用流官

獨曲阜用孔氏世職以率此邑者蓋以大聖人之子孫不使他
人統攝之也其官先由本爵保舉賢能孔氏任事後改考選廩
膳生員德行兼優者以授此職五年任滿照例考選陞轉一學
錄天下學官皆用教諭獨四氏學用學錄者蓋以比隆國學亦
以聖賢之子孫不與他學同也其官亦自孔姓生員中德行兼
懋者由本爵咨部以授此職一尼山乃孔子發祥之地亦設學
錄一員以主其祀其官係本爵弟姪中選德行秀異者咨部授
職一洙泗書院乃孔子闡教之地亦設學錄一員以主其祀其
官於孔氏中遴舉德行秀異者由本爵咨部以授此職一本爵
屬官員役明洪武元年十二月十九日欽設管句一員司五屯
錢糧司樂官一員司樂舞生典籍一員司禮生書籍掌書一名
司文移書寫一名司繕寫知印一名司印務奏差一名司差遣

以上均由本府保舉堪用人數咨部銓用一屯田孔廟祀田歷代各有欽賜至明洪武二年欽賜祭田二千大頃坐落兗屬二十七處其界址段數載在闕里志可考近以寇盜擾亂土地荒蕪佃丁逃亡錢糧無備每至祭期賣產毀器心血幾枯幸際

聖朝惟冀

新恩一佃戶凡孔廟鄆城鉅野平陽東阿獨山五屯佃戶係洪武二年欽撥民間身家無過俊秀五百戶湊人二千丁見丁百畝佃種五屯祭田辦納籽粒以供本廟祭祀等項支用其民間一應雜泛差役俱行蠲免至今年荒兵亂死亡逃移十存二三一孔廟戶丁歷代欽撥不一自明洪武二年欽撥民間俊秀子弟一百一十五戶以供本廟灑埽至今或死於荒或死於盜十存一二至於灑埽寥寥無人此又不可不加意者也一樂舞生

孔廟每年四時祭祀樂用八佾額設樂舞生二百四十名於充
屬二十七州縣遴選民間俊秀子弟以授斯役以供本廟奔走
其本生一應差徭與廩膳生員事例一體優免仍免本戶人二
丁以供本生往返盤費目今世亂多致逃亡故其樂亦廢伏乞
新旨招採一禮生孔廟禮生每月朔望及四時祭祀在本廟引
贊禮儀額設禮生六十名於曲阜縣選用民間俊秀子弟以授
斯役其優免例與樂舞生同近因兵亂死亡逃移以致禮節多
廢亦乞

新旨招採

從闕里志錄出

請正孔子諡號疏

順治二年國子監祭酒李若琳上

臣聞之記曰凡始立學必釋奠於先聖先師自漢以來代以孔
子爲先師蓋以孔子刪述六經垂憲萬世人倫之所以常明道

統之所以不墜孔子之力也是以後世帝王莫不尊崇諡號嚴重祀典

聖朝承帝王正統垂意文教重道崇儒中外悅服春秋二仲丁祭率由舊典視昔加愍於本月二十日太常寺奉禮部傳

諭新製孔子牌位兼書清漢字

臣

竊有請焉夫孔子牌位奉安

文廟孔子在天之靈所憑依者

臣

愚以爲宜令禮工二部委官

匠於本監製造新牌俟新牌告竣令

臣

等恭安

文廟然後撤舊牌焚之瘞所庶典制聿隆禮儀有序於以妥先師之靈愜奉事之忱爲攸當矣

臣

愚又有說者今

文廟現奉牌位稱至聖先師孔子之位此明嘉靖九年大學士張璁建議所改置者也質之前代追尊諡號竊有未當查自漢以來諡號不一至唐元宗始追諡爲文宣王宋真宗加諡至聖

文宣王元成宗復加諡大成至聖文宣王明朝自洪武至正德
所稱先師諡號一如元成宗舊制未之有改臣聞備古今之至
德者宜享古今之隆稱昔孔子之贊乾坤曰大哉乾元至哉坤
元曰大成曰至聖洵非孔子之德配乾坤者莫能當之今稱至
聖而遺大成得毋乾坤之義未備乎至曰文曰宣按之諡法經
天緯地曰文聖善周聞曰宣又洵非孔子之德兼君師者莫能
當之今止稱先師而遺諡號然則古之英君誼辟止曰某君某
王而去聖神文武之諡可乎張璠欲去封爵而并除諡號非確
論也臣愚以爲當今更新之會宜追復舊諡仍稱大成至聖文
宣先師孔子之位庶至德鴻名

昭代倍爲闡揚祀典於焉有光矣臣忝列儒臣職司教典事關
學宮直據所見其有當與否未敢必也伏乞

敕下禮工二部速議施行

陳孔廟事宜疏

順治二年禮科給事中龔鼎孳上

謹按孔子刪定六經垂教千古德侔天地功並日月學者宗之比於罔極生民以來夔乎未有惟德盛則享名宜隆惟功高則食報宜厚自古聖帝明王教育海內未嘗不以崇祀先聖爲兢兢也考周敬王四十二年魯哀公誅孔子曰尼父漢平帝元始元年追謚孔子曰褒成宣尼公東漢和帝永元四年封孔子爲褒尊侯北魏孝文帝太和十六年改謚孔子爲文聖尼父後周靜帝大象二年封孔子爲鄒國公隋文帝贈孔子爲先師尼父唐太宗貞觀二年尊孔子爲宣尼父高宗顯慶二年復尊孔子爲先聖乾封二年追贈孔子爲太師天授元年封孔子爲隆道公元宗開元二十七年追謚孔子爲文宣王宋真宗大中祥符

元年加謚孔子爲元聖文宣王五年改封爲至聖文宣王元武
宗大德十一年加封孔子爲大成至聖文宣王明洪武初年爵
謚一仍元舊至嘉靖九年始從大學士張璁之請改稱至聖先
師孔子夫無位而奉以王號吳澄已有懼得罪聖人之文塑像
而被以冕章邱濬亦謂非神而明之之義璁之議改不爲無見
但易王而師可矣因稱師而遂削其大成文宣之號可乎易塑
像而木主可矣因木主而并殺其侑舞邊豆之數可乎此先臣
王世貞所以致歎於輔臣禮官曲加迎合傳之天下後世不免
貽譏有所竊見而愾然倡光復之論也今者

聖明御宇一道同風禮樂咸興文謨丕顯不亟乘此時有所釐
正以示萬代之法程無論大典有所未光亦是臣等誦法孔子
者之罪矣謹就祭酒臣若琳等所請而稍抒一得以備參稽可

乎其謂先師牌位宜仍定爲大成至聖文宣先師孔子此誠至

當不易之論無俟臣言按謚法經天緯地曰文聖善周聞曰宣

而當日張璪持議則謂宣之一字於謚爲輕不足盡聖人之德

夫謚之爲言舉一端而全體備既聖善已著大凡何至槩抹前

人目爲荒誕故謂宣輕而思有增益焉可也因議宣而槩爲削

斥焉不可也此所當確議者也僭舞益而八簋豆益而十二雖

曰天子禮樂乎然既素王奉之矣德足配天則不可以位限况

聖功大於堯舜者哉且成均者天子講學尊師之地也以天子

自尊其師而用天子之禮樂誰曰不宜先朝憲孝二宗與賢臣

王恕周洪謨等考據增加有繇來矣當時議減者誠近偏畸及

今追復焉何疑僭濫此所當確議者也大成殿額更爲先師廟

意存簡樸實匪舊章幾令峻極之宮牆不得與梵寺琳宮並稱

比美紳衿之士入駿奔而出瞻仰能無色沮心慙乎矧廟者統
詞也殿則棲神之所也譬之堂焉室焉各有其處殿之不可稱
廟猶夫室之不可稱堂也烏得而消之故大成殿之不可不復
蓋舊章也此所當確議者也從祀諸賢遠不具論若宋元以來
人品醇疵了然在人耳目稍辨黑白者能知之嘉靖中登歐陽
修而遺范仲淹先臣王世貞以爲餘憾其謂仲淹力振綱常首
扶神器兼於戎馬倥偬之際以中庸誨引張載俾成大儒彬彬
乎歐陽子之右矣夫生爲名臣表章聖道而後乃寂焉不得分
芹俎之末光事理不平孰甚於此至如元標理學實無可譏允
宜從祀贊宮伏乞

皇上下

臣

章令諸

臣

博議如芻蕘可採一并覆議施行蓋今日

教胄子於虎闥羽籥管絃聿新園橋之聽睹異時拔名卿於髦

士衣冠文物其襄一代之治平皆先聖先賢之所憑依而亦

聖子神孫之所取法者也臣雖閭陋竊幸其區區之愚至如衍

聖公來朝京師宜加優禮以示隆重闕里之廟庭禮器宜

敕諭所司以時修飭用肅觀型是則

聖明自有曠恩而非微臣所敢贅矣

請增從祀理學真儒疏

康熙二十二年國子監祭酒王士禎上

竊惟至聖之道萬古爲昭兩漢以來諸儒凡發明經傳踐履純

正者皆得從祀兩廡俎豆千秋典至隆也臣查現在從祀先儒

外列代諸儒有功聖門尙有當酌議從祀者敬爲我

皇上陳之漢儒功在經傳如詩書春秋三禮授經諸儒皆已從

祀而易獨無之按田何當漢初授易實爲聖門商瞿嫡系此漢

儒之當補祀者也鄭康成博稽六藝所註詩禮諸經百餘萬言

史稱純儒唐宋以來皆列從祀明嘉靖間始以張孚敬之議改祀於鄉公論久鬱此漢儒之當復祀者也程門弟子首推尹焞先儒稱其學窮根本德備中和考其出處本末毫無可議朱子之後推何基爲正傳其學以立志爲先居敬爲要於大學中庸大極通書西銘皆有發揮此宋儒之當從祀者也至於明代理學實肇於霍州學正曹端其學以誠敬爲主力闢邪說薛瑄稱其質純氣粹理明心定爲有明理學之冠禮部尙書章懋由博返約斂華就實其學粹然一出於正難進易退天下仰之國子監祭酒蔡清學以六經爲正宗以四書爲嫡傳所著蒙引尤見窮理之功禮部侍郎呂柟篤志聖賢之道其講學之要曰文以載道行必顧言左春坊贊善羅洪先以躬行之實學闡良知之真傳安貧樂道有簞瓢陋巷之風刑部侍郎呂坤以理學爲經

濟有體有用所著諸書皆鑿鑿可見施行以上六人操履篤實
咸有著書發明聖道此明儒之當從祀者也又絳州貢生辛全
生值明末力以正學爲己任著書甚富以時代稍近未敢輕議
合無

敕下該地方官徵其遺書備

乙夜觀覽或亦可仰裨

聖學之萬一也伏乞

睿鑒敕下禮部議覆施行

請正從祀諸賢位號疏

康熙二十七年國子監祭酒王士禎上

竊惟

文廟之祀從以四配十哲兩廡諸賢凡以紹述心傳功在萬世
也臣詳閱會典諸書竊見從祀諸賢諸儒名號位次尙有未當

有宜一併釐正者敬爲我

皇上陳之十哲之位不稱名而稱子是已但自明嘉靖間議去
詩之後四科之內稱冉子者凡三殊難辨識兩廡諸賢諸儒
則直書其名而不稱子視十子何遽懸殊臣愚以爲宜將神位
俱稱先賢先儒某子之位而以諱註其旁以昭尊崇之意者也
至宋代周敦頤程顥程頤邵雍張載朱熹六子闡明絕學遠紹
洙泗之傳實超前代諸儒明崇禎間遂將六子改稱先賢臣等
竊以躬及聖門者槩稱先賢私淑者改稱先儒此以時代論非
以造詣論也今旣改稱先賢未敢輕議但位漢唐諸儒之上於
世次殊有未安又諸賢諸儒位次會典闕里志諸書所載與今
太學神位互有不同並宜詳議妥確通行天下學宮著之
本朝會典以垂永久者也伏乞